

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IANUARI 2024

email: sulusamoa@cccs.org.ws - Main Office: Ph. 24414, Ext 29 - website: www.cccs.org.ws

A'OA'O MA FALETUA MO MALUA 2024



FAASINO UPU

1. O LE LAUGA	2
2. FEAU AMATA 2024	4
3. LMS, LALA I SAMOA	5
4. TUSI PAIA & TUPE	5
5. ITULAU MO FANAU	6
6. O LE PEROFETA MULIMULI	8
7. NA O AFIGA E TULEI MAI	12
8. IUGA SUEGA KOLISI EKALEZIA	14
9. O E UA MALILIU	15

O LE LAUGA

Tusi Faitau: Mareko 1: 1 – 15

Matua:f.2 & 3, “²*Faauta, ou te auina atu la’u sāvāli e muamua atu i ou luma, na te teuteua lou ala. ³O le leo o le ua alaga i le vao, Ina teuteu ia outou le ala o le Alii, ia faasasa’o ona ala.*”

Manatu Aoao Vaiaso: O LE TALA LELEI A MAREKO – TEUTEUINA O LE ALA

Manatu Autu Aso Sa (14/1/24): **Malaga a Ioane ia Iesu.**

O loo ta’ua i nisi o tusitusiga ma mafaufauga faaleagaga, nisi o metotia a Mareko, o mamau ai lana molimau i le Tala Lelei ia Iesu. O metotia e aofia ai le aupito pu’upu’u o lana Tusi e fua i mataupu o i ai (16 Mataupu, 24 itulau), faatusatusa i isi Evagelia. O loo atagia ai le agaga o le faanatinati, ia vave lona faatamo’ega. O le natura lea o le auauna, e faatopetope ia vave uma ana feau, e tusa ma lona tofi faa-tautua a le pologa faamaoni. E faapea le tautua a le Keriso, o loo molimau i ai Mareko.

E maitauina foi le tau leai o ni faamatalaga uumi e auiliili ai mea o tutupu. Peitai ane, ua matilatila mai i le amataga, le auiliili mai o faamatalaga faasino ia Ioane le Papatiso, le Teuteuala. O ona la’ei, o ana taumafa, o le nofoaga na ola a’e ai, o lana galuega, ma lona sao i le galuega faaola a Iesu. Aisea ua faataua ai Ioane? A e lē sau loa Iesu, amata loa ma faasolo lana galuega, seia oo ina uma?

I se gagana faatusa i la tatou aganuu o le ‘ava, le agatonu, le alofi, pe a fesaga’i paia, faafeagai

sega’ula. Ua sau le vaa na tiu, tau mai i le vaa na tau. Ua taunuu mai le faiga malaga umi a Isaraelu, na tauasa mai le Feagaiga Tuai. Lea ua fesilafa’i nei ma le Mesia valoia, o le Keriso Faaola, ina ua oo i ona aso e tatau ai, ua tau mai i le Feagaiga Fou.

O le fesilafaiga, ua laga faatau ai Ioane, ua faatuulima, paelago paia ma mamalu o le taeao, ua na fofola le fala, ua na faafesoota’i lelei le Feagaiga Tuai i le mea e gata ai, ma le Feagaiga Fou, i lona amataga o le Tala Lelei ia Iesu Keriso. O ai o pogisa, faanenefu ma nunumi i le va lea, o Ioane ua na teuteu ia manino ma mafolafola lelei. Pe a ma le 500 tausaga talu ai, na gata ai ona vaaia ma faalogoina, se si’ufofoga e tau alaga faapenei, e la’ei faapenei, e taumafa ma soifua i le vao faapenei. Ina ua mavae atu Elia, na valoia e Isaia, valoia e Malaki, e muamua tula’i mai le sāvāli, e teuteu ma sauni le ala, a o le’i afio mai le Keriso.

Sau Ioane, o le manatu maua luga o Iutaia, o ia lea sa faatali i ai, o ia le Mesia na te laga le toilalo o le nuu mai pulega a Roma. Peita’i, sa le’i seetia gofie pe faasesēina ai, le tama o le vao. Na ia iloa lelei lona tulaga, lona va feagai ma lona Alii; o lona muamua mai, o lana feau e tapena, teuteu, sauni loto o Iutaia, mo le afio mai o lo latou Mesia, le Faaola. Na ia ta’utino lona faatauva, e lē aogā ia e punou ifo, ma tatala nonoa o seevae o Iesu, o Lē e sili, o loo mulimuli mai. O lana papatisoga, e fai i le vai o le Ioritana, le vai e filogia i tafega o le au, a o Iesu e papatiso i le Agaga, e mamā, e pa’ia ma mamana. E papatiso e Ioane tagata ia salamō mai a latou agasala, a o le Keriso, o Ia na te amo le avega mamafatū, e totogi le tau o agasala. O le Tama’i Mamoe e osi ai le taulaga mo le faamagaloga, ma le faaleleiga.

O se vaega taua o le muamua mai o Ioane, o le tapenaina o Iesu lava ia, e ala i le papatisoina o ia. E lē ona faapea sa i ai se agasala a Iesu. A o le faailoga, o le auai faatasi o le Mesia ma ona tagata. O le alofa faamaoni o le Atua, ua liutino tagata, ia militino faatasi ma tagata agasala, ina ia faaolaina. Papatiso e faatofu ifo ia lilo i le vai, toe faaea a’e i luga. O faailoilo i lona maliu e tanumia, ae toe tu manumalo.

Lea lava na vaaia i le aso o lona papatisoga, le faamaoniga o lana misiona. Ina ua maliu a’e Iesu nai le vai, ona iloa lea o le lagi ua *masae*, ma le Agaga ua afio ifo i ona luga pei se lupe. Ma le

si'ufofoga mai le lagi, "*O lo'u Atalii pele oe, ou te fiafia ia te oe.*" Na ta'ua e se tasi o a'u uo faifeau faapea, o lona nuu e mitamita tele i lo latou faalupega, *o le nuu e masaesae ai le lagi.* Na ia lauga atu i ai, pau lea o tagata e masaesae ai le lagi, o tagata e amio ma soifua o atalii ma afafine o le Atua, pei ona fetalai ifo le Atua i lona Alo.

Fai mai Mareko i le fuaiupu 4, *Ua oo mai Ioane le papatiso i le vao, ma tala'i atu...* a o le fuaiupu 12, ina ua uma ona papatiso Iesu, fai mai, "*Ona ave loa ai lea o Ia e le Agaga i le vao.*" O le vao, o laufanua e gaoā, pogisā, tuufua, pāū, na o manu fe'ai ma mea ola tata'a e fiafia e nonofo ai. E i ai se feau faaleagaga tāua o fia ta'u mai e Mareko, e ala i le nofoaga, o le vao, na tala'i, papatiso ma teuteuala ai Ioane, ma sa ave foi i ai Iesu. Ina ia tū matila a'e ai, le tulaga pagatia sa i ai le lalolagi atoa, i le fanau a tagata. E lē gata ia Iutaia, ae faapea foi i nuu ese. O se lalolagi sa tafili saunoa ai le tevelo fe'ai, le temoni sauā, satani ma ana 'au. E faamatala mai ai, lo latou 'au'au faatasi, nofo sauni e faalavelave, tete'e, taofi le galuega a Iesu. Peitai, e ui ina faigata, tele faafitauli, a e sa manuia ona o le lelei o le teuteuina e Ioane o le ala. Ina ua ia teuteu i auala faaleAtua - e tumau ma le faamaoni, onosai ma finau, loto tele ma faamalosi, e lē femoumoua'i pe faavaivai gofie, a e faatuatua ma faalagolago i le Atua.

"*O le leo o le ua alaga i le vao...*" O se itu tāua tele, le va feagai ai o Iesu ma Ioane, i lo la'ua faiā faaletino – e aiga lelei, e ala i o la'ua matua, le tina loomatua ia Elisapeta ma le tina taupou ia Maria. E matua Ioane ia Iesu, tusa ma le tala a le isi Ioane. E tusa o lona molimau, sa tau faaluafesasi le Papatiso, i lona āva ma le fa'aaloalo ia Iesu, na tau 'alo ai i le faatinoga o lona tiute. Lea na a'oa'i ai Iesu, ina ia faataunuu mea amiotonu uma. Ia 'aia le avea le fa'aaloalo e ufiufi ai mea e tataua ona fai. Ia 'aia le faia faale'āiga, 'aia le faia i le masani, po o ni fesootaiga faaletino le galuega, a ia fai le mea e tonu ma sa'o i luma o le Atua. A ua manatua ai foi, ina ua auauna le Papatiso e matua, i le Keriso e itiiti (fua i aso o le soifua), le mea na faia e le toeaina o Aperaaamo i le tama talavou o Lota – na faamuamua, faasilisili, faaeaea i ai. O se vaega o le ola teuteuala.

Manatu o se feau lelei foi lea ua faamanatu mai e le Tala Lelei mo i tatou. Ina ua fai i tatou ma

meafaigaluega a le Atua, e teuteuala pei o Ioane. Ina ia teuteu o tatou loto ma agaga, ia avanoa e afio ai le Alii. Ona tatou aapa atu lea i o tatou lotoifale faaleaiga, e fesoasoani, lagolago e teuteu loto, amio ma olaga o fanau, o uso, tuagane, ma tuafafine. Faasolo atu i le Ekalesia i o tatou uso ia Keriso, o tuaoi ma le lalolagi lautele o i le vao lafulafuā.

O loo taualuga le malaga a Ioane ia Iesu, i le tu'uina o ia i le fale puipui. O tuatuagia o lona loto tele e tautala i le amiotonu, ta'utino le finagalo o le Atua, sa le'i fefe pe taofiofi lona leo faaperofeta, e sunu'i ai faiga pi'opi'o ma amioga inosia. Na ia faailoa amio leaga ma soliga tulafono a faauluuluga o le malo, o ta'ita'i, faipule, tupu, masiofo ma soo se tagata. Na i'u ai ina falepuipui, mulimuli ane fasiotia, ina ua vavae ese lona ulu. Ua na faatomua ai le i'uga e taualuga ai le galuega a Iesu.

O loo i ai le mafaufauga o moomooga alofa mo Ioane, e tusa o lona vaai, faalogo mafuta ma Iesu, a e na te le'i silasila ma silafia, lona satauro. Ui lava i lea, o le ala na ia teuteu mo le Alii, o le ala o le satauro, le faailoga o le soifua sasa'a atoa mai, e faaolaina ai tagata e toatele.

Le Ekalesia pele a Iesu Keriso ma le au faitau Sulu Samoa, e toatele Kerisiano e fia mulimuli ia Iesu, a e lē fia mulimuli i lona satauro, e mumusu e amo o latou satauro, e tauave o latou tiga, e amo le mamafa, e mā e faatasina, inosia ma tauemua ona o le satauro. Mata o le mafuaaga foi lea o le toatele o tatou tagata lotu EFKS, e solomuli ese ai mai le faatuatuaga na fofoa mai ai e matua, ma o atu i isi ituaiga o tapuaiga fou, e faigofie ma taugofie, na o le alalaga aunoa se afu e sisina, se toto e maligi. E lē fia Kerisiano Samoa, i ana tu ma aganuu pele o loo lagolago i le galuega a le Tala Lelei; ua 'alo 'ese mai le tofi na tuuina mai faapitoa mo tatou o tagatanuu Kerisiano Samoa. Ia 'aia nei faapea i tatou, o EFKS faamaoni.

Ina o se'e lo tatou sa folau o lenei tausaga, ia manatua lo tatou valaauina faa-soo faatuatua moni, e molimau ma faasalalau le Tala Lelei o le Faaolataga. E teuteu le ala o le Alii, ia faatumauiina, faalelei atili, mo le viiga o lo tatou Atua. Ona o Iesu. Amene.

**(Saunia Faitoaga Tolua FS
(e sui ai le Lauga na tofia).**

TUSI MO SUEGA ULUFALE **MALUA 2024:**

Feagaiga Tuai - Hosea

Feagaiga Fou - 1 & 2 Korinito

FEAU AMATA 2024

Na toe a'e mai i le Aso Tofi, 4 Ianuari 2024, galuega a le Ofisa Tutotonu o le Ekalesia i Tamaligi, a le Afioga Taitaifono Fono Tele ma le mamalu o le Laulau o le Fono Tele, aemaise le susuga Failautusi Aoao ma le Teutupe (o Ofisa Sili o le Ofisa Tutotonu), o Faauluuluga o Matagaluega eseese ma le aufaigaluega i Faifeau ma A'oa'o ma Faletua, o alii ma tamaitai o galulue i soo se vaega o le Ofisa Tutotonu. O le vave a'e ai o galuega, o se faatofalaiga i le susuga Failautusi Aoao ma le Teutupe, ina ia tapena ai mea e tatau, mo fonotaga a le Au Toeaina ua faamoemoe mo le vaiaso e sosoo ai.

O le sauniga lotu e amata aloaia ai galuega o lenei tausaga, na ta'ita'iina e le Sui Taitaifono Fono Tele susuga Tunumoso Soliola Iosia FT. Na saunoa faala'ei'au faamalosi'au le Toeaina Sui Taitaifono i le aufaigaluega, a o aga atu mo tiute faatino o lenei tausaga. Ona talifaitau lea o le susuga Failautusi Aoao, na ia faamanuia foi i le alo faiva o le Laulau a le Fono Tele, le nofo a Komiti ma le Ekalesia Aoao i le nofo a Aulotu, Pulega ma Matagaluega, i lana molimau o le Tala Lelei o lenei tausaga ua amata. Ona alo lea i le taumafataga na fa'afao i ai aao o le susuga Failautusi Aoao

ma le Faletua, faapea lo la'ua fa'aaloalo i meaalofo ma le Toeaina, le Teutupe ma Faauluuluga o Matagaluega o le Ofisa Tutotonu o le Ekalesia. Malo faafetai le alofa, pelega o tofi ua valaauina ai. O le vaiaso na sosoo ai na amata ai galuega a le Komiti Au Toeaina i lona faasologa:

Aso Gafua 7 Ianuari: O le Faatalanoaga a le Laulau Komiti Au Toeaina ma A'oa'o sauni e a'e mo Malua. O le Fogafale Ono o le Maota Ioane Viliamu na faia ai lea faatalanoaga.

Aso Lua 8 Ianuari: O le Ta'utinoga a A'oa'o mo Malua, na faatautaia e le Komiti Faatonu, i le Maota o Tupulaga. Na amata i le sauniga lotu na ta'ita'iina e Asotasi Gu Time FT, le Taitaifono Komiti Au Toeaina. E 18 A'oa'o na faamanuiaina i le Su'ega Ulufale 2023, ma le A'oa'o e toatasi na pasi i le 2022, a e o lea faato'a sauni ma lona faletua e ulufale i le tausaga nei. O se tala fiafia mo le tapuaiga a matua ma aiga aemaise o susuga Toeaina, Faifeau ma Faletua o matua faaleagaga, ina ua saunoa le Taitaifono Au Toeaina, ua manuia uma le ta'utinoga a le vasega ua sauni mo Malua.

Aso Lulu 9/1/24: Fono Komiti Malua.

Aso Tofi 10/1/24: Fono Komiti Faatonu

Aso Faraile 11/1/24: Komiti Faamisionare

O isi vaiaso e lua na sosoo ai, na faatautaia ai Asiasiga ma Fonotaga a Komiti o A'oga, Komiti Atina'e ma le Komiti o Feau Eseese. O se tasi o iugafono iloga a le Komiti Atina'e, o le faamavaega a le afioga Taitaifono, susuga Alesana Afamasaga FS ona o lona gasegase. Ua se'e atu nei i ai le susuga Fuaao Fuimaono FS (APIA) i le Ta'ita'ifono, a o le susuga Eroni Sitanilei FS (MALUA) ua filifilia i le tofi Failautusi.

LMS, Lala i Samoa

O le Sosaiete a le LMS, o se tasi o faalapopotoga po o sosaiete ua fausia e nisi o le aufaigaluega ma tatou tagata tapuai, e lolotu ma auauna i le Atua i totonu o le EFKS. Ua aofia uma ai le aufaigaluega o Toeaina ma Faifeau ma Faletua, o A'oa'o ma Tiakono ma le lautele o tagata Ekalesia. O se sosaiete ua leva ona faavae e o tatou auga tama ua lagomau mai ti'asa, o le toatele sa soifua ma galulue mai, a o ta'ua pea le tatou Ekalesia i le igoa LMS, e le'i suia i le igoa ua i ai nei, O le Ekalesia Faapotopotoga Kerisiano Samoa, na suia i le 1961. Ua le na o Samoa foi, a ua i ai ona Lala ma ona sui i totonu o Amerika Samoa (EFKAS), o Niu Sila, Ausetalia ma Amerika. O le Laulau a le LMS Aoao o loo Taitaifono le susuga Apisaloma Aliinuu o le lala Aukilani, o le Failautusi le susuga Paulo Korias FS (Faifeau Penisione EFKS Aleisa Sasa'e), a o loo avanoa le Teutupe talu ona maliliu le faletua o le lala Aukilani sa ia tauaveina lea tiute.

O le Lala i Samoa nei, o loo Taitaifono le susuga i le Toeaina ia Palemia Tauiliili Reupena FT, Failautusi le susuga faafeagaiga ia Napoleone Vaiaso FS, ma le Teutupe o le susuga Pati Crichton FS. E silia ma le 20 ona sui auai, aofia ai le afioga Taitaifono Fono Tele susuga Esera Auatama Esera FS ma le faletua ia Tamara. E talia ma faafeiloai fiafia i le agaga faauo ma faauso ia Keriso, soo se tasi e fia auai. O le faamoemoe o le sosaiete, ia maua pea le mafutaga faasoo, ma faia atina'e lelei i nisi itu e lagolago ma fesoasoani ai i le galuega lautele a le EFKS ma le Tala Lelei ia Iesu Keriso i le lalolagi atoa. O le LMS na latou fausia le maota o le IA MALAMALAMA, ma le fale o le Pule Kanana Fou.

O loo fai a latou sailiga seleni i lenei vaitau, faamoemoe mo se malaga asiiasi i le aai o Ierusalem i le masina o Iulai, pe a aulia i le alofa o le Atua. Pe afai e le mafai ona taunuu ona o taua i lenei itu o le lalolagi, ona suia lea i se isi nofoaga e talafeagai ma i latou. O la latou LULU na se'i i le Aso Faraile 26 Ianuari, i lalo o le vaaiga a Malu o le Malo ma le Ofisa o Taaloga Fai Tupe a le malo, sa faataunuu i le maota faafeagaiga EFKS Vailoa tai. Ia manuia la outou galuega lagolago ma fesoasoani i le faatupeina o nisi atina'e tetele a le tatou Ekalesia.

Saunia: Faatonu Sulu Samoa

TUSI PAIA & TUPE

Salamo 62, ¹⁰*A faateleina le oloa, 'aia nei ua i' o outou loto i ai.*

O tupe o se mea ua sili ona aogā ma tāua i le olaga o le tagata. O le ala foi lea o le saili i ai o tagata ia maua tupe, ia tele, ia faaputu ia lava ma totoe. O nisi tagata e fua le tulaga o lagona ma faalogoga, ma le gasologa o feau o le aso, i le tulaga o le lava, po o le 'uti'uti o le tupe. E ao ai ona tatou toe vaavaai pe se a le a'oa'oga a le Tusi Paia faasino i lea auauna aogā. Pe afai e tuu atu e le Atua lona faatuatuaga ia te oe i nai mea iti, e faapena foi ona la avatu mea e tele. Luka 16, ¹⁰*O lē faamaoni i le mea itiiti, e faamaoni foi o ia i mea e tele.* (silasila foi i le 2 Kori. 9:6-11). Na te aumai faamanuiaga tatou te manaomia, peitai e aumai foi ma ana tu'utu'uga, i le auala tatou te fa'aaogaina ai ana meaalofo taua. E pei o nisi nei, ua vaoia faatulafono mai:

i 'Aua e te taumafai e faoa le viiga e tataua ona faafoi i Lē na maua mai ai au tupe, o le Atua lea. Na fetalai le Atua ia Isaraelu, Teute.8, ¹⁰*Ia oe, nei galo ia te oe le Alii lou Atua.* ¹⁷*nei e faapea ifo i lou loto, O lo'u malosi ma le malosi o lo'u lima ua ou maua mai ai lenei oloa.* ¹⁸*A ia e manatua le Alii lou Atua, auā o Ia na te avatua ia te oe le malosi e maua ai oloa.* ¹⁹*Afai foi e galo ia te oe le Alii lou Atua..e faaumatia lava outou.*

ii 'Aua nei galo ia te oe isi tagata. O loo faatonu mai e le Tusi Paia. I Timoteo 6, ¹⁷*Ia e matuā fai atu i e mauoa i lenei olaga, 'aia ne'i faamaualuluga i latou, 'aia foi le faamoemoe i le oloa e faaletumau, a o le Atua soifua, o loo foai tele mai ia te i tatou mea uma lava e faafiafia ai.* ¹⁸*Ia latou agalelei atu, ia tamaoia i galuega lelei, ia mataalofo, ia latou avatu fua a latou mea.* ¹⁹*ma ia faapea ona latou teua oloa mo i latou lava, o le faavae lelei mo aso atali, ina ia latou fetagofi atu i le ola moni lava.*

iii 'Aua nei faamaualuga pe mitamita vale, ona o le tele o tupe. Fai mai le perofeta o Ieremia 9, ²³*O loo faapea ona fetalai mai o le Alii, 'Aua nei mitamita le tagata poto i lona poto, aia nei mitamita foi le mauoa i ana oloa;* ²⁴*a o lē mitamita, ina mitamita ia o ia i lenei mea, ina ua mafaufau o ia, ma ua iloa a'u, o a'u lava o le Alii...*

(fa'aauau itulau 7)

ITULAU MO LE FANAU

O LE TUPU POTO MA LE PI

Tamaiti o le tala lenei o se tala ua leva, e toe fia faamatala mo outou a o amata a’oga o lenei tausaga. O aso lava ia ua leva, sa i ai se tupu sa sili ona potu ma atamai i le lalolagi na i lo se isi tagata. Na a’oa’oina le tupu, ma na iloa ai mea eseese e uiga i tagata, manu, manu felelei, i’a ma iniseti. Na iloa e le tupu tali soo se fesili, a tagata a lona malo, po o tagata foi mai isi atunuu mamao o le lalolagi. I se tasi aso savili, na lelea atu ai se pi (bee) i totonu o le maota o le tupu potu, ma ua le mafai ona toe sao atu i fafo. Ona fai atu lea o le pi i le tupu, *“Faamolemole, ia e alofa faasao ia te a’u. A e i ai se aso ou te tau ai le lou alofa.”* Sa ‘ata le tupu i lona manatu, pe faapefea ona fesoasoani atu lenei pi laititi ia te ia? *“Alu ese vave mai lo’u fale, e leai se mea ou te mana’omia mai ia te oe.”*

I se tasi aso mulimuli ane, na faatumulia ai le maota ma le lotoā o le tupu i tagata o le malo, e faatali se malo fa’aaloalogia a le tupu e malaga mai. O se tupu tamaitai, poo le masiofo o se isi malo, ua sau e tofotofu i le potu o le tupu. *“Ua ou faalogo mamao mai i le maoa’e o le potu. O lea ua ou sau e tofotofu pe sa’o le tala na ou faalogo ai.”* Ona amata lea ona fai o ana fesili, o ana tupua, ma paso eseese e tofotofu ai le tupu, ma na faigofie lava ona tali e le tupu nei fesili uma. Sa ofo le tupu tamaitai i le atamai ma le potu tele o lenei tagata.

O se tasi aso, na tuu atu ai e le tupu tamaitai se maa tāua i le tupu, o lenei maa tāua sa i ai se pu itiiti i lona ogātonu, e fepi’opi’oa’i mai le tasi itu e oo i le isi itu. Na fai atu le tupu tamaitai i le tupu, *“Vaai la pe mafai ona e tui atu se filo i totonu o le pu lena e i totonu o le maa tāua.”* Sa ataata lemu le tupu ma fai atu i le anufe silika, e totolo atu i totonu o le pu i le maa taua. E lē o se mea faigatā i le anufe ona fai lea feau na o le tolotolo, ma toso atu ai lona filo silika, seia oo i le isi itu. Sa ofo le tupu tamaitai i le potu o le tupu, na te iloa lelei e i ai le filo i le anufe, e

mafaia foi e le anufe ona sosolo i totonu o se pu itiiti ma soo se avanoa malō pe talatala. O le isi foi aso, na faatonu ai e le tupu tamaitai ina ia tuu ni tama e toa lima sefulu, ma teine e toa lima sefulu, ma ia tutusa lelei o latou ofu e fai, e tuu faatasi i totonu o le potu. Se’i vaai pe iloa e le tupu le eseese, o ai teine, a e poo fea foi tama? Peitai sa iloa lelei e le tupu le auala e maua ai le eseese. Ona faatonu lea e le tupu o ana auauna, ina latou aumai ni tanoa vai e tofua le tamaititi ma lana tanoa vai. Ona fai atu lea o le tupu i tamaiti, *“Tamaiti, ‘aua ne’i faia pei o se tauvaga po o se tuuga, a e fufulu faalelei outou mata mai a outou tanoa vai.”* Ui i lea, na ona fai atu lava o le valaau e amata, fai loa le taaloga a tama e faapisipisi solo le vai, a o nai teine na o le faapa’i o tumutumulima i le tanoa. O le auala lena na iloa gofie ai e le tupu ona tuu eseese tama mai teine.

Na ita tele le tupu tamaitai i ana faufautua ma ta’ita’i malaga, ma na ia faatonu ai ina ia saili se auala e iloa ai le tupu e valea, a e lē o le atili ai ona faamaonia o lona potu ma le atamai. Sa faapea lava ona latou fausia loa se auala e sili ona faigatā. Na faatonu e le tupu tamaitai o ana auauna gaosi mea, ina ia gaosi ni fugalaau matagofie se iva sefulu ma le iva, ia tutusa lelei o latou foliga – o fugalaau fausia e lē ni mea moni. Ona aumai lea ma le fugalaau e tasi mai le faatoaga a le tupu, ua tuu faalilolilo faatasi ai ma isi fugalaau sa gaosia.

O le aso na sosoo ai, na fai ai le taumafata tele i le maota o le tupu. Na auai le toatele o faipule ma tagata o lona malo, faapea le malo fa’aaloalogia o le tupu tamaitai ma lana au malaga. A o fai le taumafataga, na tulai atu le tupu tamaitai ma folafola atu, *“O le aso lenei e fai ai le sailiga mulimuli, pe moni e potu ma atamai le tupu. Ua uma ona gaosia e o’u tagata popoto, o fugalaau matagofie e iva sefulu ma le iva, e tutusa uma i latou. O loo i ai ma le fugalaau e tasi, o le fugalaau moni, a o loo natia ai i totonu o nei fugalaau. A mafai la ona ta’u mai e le tupu poo fea le fugalaau moni e tasi, ona ou talitonu lea i lona potu ma lona atamai.”*

Na vaai atu le tupu, ma ua amata ona faaletonu lona mafau. Ua popole tagata o le malo, ma fesilisili ifo pe mafai e le tupu ona tali le lu'i a le tupu tamaitai. Sa le'i iloa e le tupu le mea a fai. Na faafuase'i lava ona lagona e le tupu le leo o se iniseti o loo ūū solo i totonu o le maota. Na latalata mai le iniseti i le tupu, ma iloa ai o le pi – le pi lea sa faasaoina e le tupu i aso ua leva, mai totonu o lona maota. *“O a'u lea na e faasaoina mai lou maota. Ua ou sau, ou te fesoasoani ma auauna atu ia te oe, e pei ona sa ou folafola atu ai i lena aso.”*

Na lele atu loa le pi, na ia iloa gofie le fugalaau moni, i lona sogisogi atu i le manogi ma lona tofo atu i le suamalie o ona fuga, ma tu ai loa i ona luga. Sa tago atu loa le tupu ma aumai le fugalaau ma tuu atu i le tupu tamaitai ma lana aumalaga ma ona tagata gaosi oloa, na latou faamaonia o le fugalaau moni lea. Sa tautino loa e le tupu tamaitai, ua uma ona masalosologa, ua uma lana tofotofoga, e moni lava, e sili le poto ma le atamai o le tupu lenei.

Ioe tamaiti, o le tupu poto lena e igoa ia Solomona le atalii o le tupu o Tavita. Na fesili le Atua ia Solomona pe se a se mea e mana'o i ai, ona tali lea o Solomona e foai mai le poto ia te ia, na te iloa ai ona pulea ma fai faamasinoga tonu a lona malo. Sa fialia le Atua i le mana'o o Solomona, ma Ia fetalai mai, *“Faauta, ua ou faia e faapei ona e fai mai ai; faauta, ua ou foaiina atu ia te oe le loto poto ma le matala; sa leai se tasi na muamua ia te oe e tusa ma oe, e le toe tupu mai foi se tasi e mulimuli ia te oe e tusa ma oe. Ua ou foaiina atu foi ia te oe ma mea ua e le faatoga mai ai, o le oloa atoa ma le mamalu; ina ia leai se tupu e tusa ma oe i ou aso uma.”* 1 Tupu 3:12-13.

Ua amata a'oga o lenei tausaga, i le sailiga o le poto ma le atamai. E maua le poto ina ua tatolo i le Atua, to'aga ma faamaoni e fai mea-a'oga. *O le mata'u i le Alii, o le amataga lea o le poto.* Ua tele lava auala i nei ona po e maua ai fesoasoani mo a outou mataupu. Ua faigofie lava ona saili i luga o upega tafailagi, ma maua mai soo se tali e manaomia. A e ia saili ma fesili i le Atua, e mautu ma tumau ai le poto ma le atamai.

Saunia e F. Tolua (Faatonu Sulu).

A'O A' O LE TAMA...

Ina ia tutupu a'e le fanau i se olaga mautū faaleagaga, e ao ona latou malamalama lelei:

i **Pe faapefea lagona o le Atua mo i latou.** O la le FaiSalamo 136, *“Ia outou vivii atu i le Alii, auā e lelei o Ia, auā e faavavau lava lona alofa.”* Ia vave ona iloa e le fanau, o le Atua e lelei, i taimi uma. Ia le gata ina popoto ai e tauloto, a ia mautū i totonu o latou loto.

ii **Pe faapefea lagona o latou matua mo i latou.** Ia 'aia le tuua lau sasa, e a'oa'i ai i latou. A ia iloa foi e le fanau, o lau sasa, o le sasa o le alofa ina ia latou i'u lelei ma manuia.

iii **Pe faapefea o latou lagona ia i latou lava.** O se lagona tiga i le fanau, pe afai e tau solomua i matua le faavaivaia, faaleaogā ma faatōina o latou faamoemoe a o loo i ai i le amataga o latou olaga. 'Aua le tuua se lagona i fanau, ua vave ona avea i latou o vale ma tagata toilalo, a e le'i i ai se avanoa e taumafai ai. Ta'u i ai o i latou na faia e le Atua, o loo faato'a amata, ma e i'u ina matutua ma manuia foi pei o i tatou. Ia tele avanoa mo i latou e faata'ita'i ai, e iloa ai ma tauivi atili.

iv **Pe faapefea lagona o latou uo ma paaga ia i latou.** Afai e fialia ma faamaonia e a latou uo, lo latou soifua a'oa'oina lelei, o se mea lelei lea. Pe afai foi e leai, a o loo lelei laasaga i – iii, o le a manuia lava pe a taumafai atili pea.

Ia tautuana ma i tatou matua, ona tausī ma a'oa'oina lelei le fanau, o tofi mai le Atua. Ia a'oa'o i latou, e tusa ma ala o le Atua. (F.Sulu)

...TUSI PAIA & TUPE...

iv **'Aua ne'i faatagaina se isi lava mea, e fāoa le tulaga o le Atua.** Fai mai le Faataoto 30, *“⁸Aua e te tuu mai ia te au le mativa po o le mauoa; ia e fafaga mai ia te au i ni mea e 'ai e tatau ma au; ⁹ina ne'i o'u matuā ma'ona, ona ou faafiti lea, ma ou faapea, O ai ea le Alii?”*

Ia manatua, tatou te le onaina se mea e tasi; o i tatou ua na o ni tausī mea a le Atua, e faatino, faasafua ma faasoa atu ana faamanuiaga. O se galuega tele ma le faigata lea tiute taua, o le mea lea ia faamaoni ma ia lelei ona tatou faia. O tupe ua na o se auauna, a e lē o se atua. (F. Sulu)

O LE PEROFETA MULIMULI

(O le tala faafagogo ua faaSamoaia mai le tusi, ‘The Last Oracle’ tusia e James Rollins.)

8.38 afiafi

Peripiatu, Ukaraia

Na tapuni e Nikolao lana telefoni. Ua aveese atu ai le isi faafitauli. Na ia savali ifo i lalo agai i le faafiafiaga tele. Na leotele le musika, o se pese faaRusia mai le sefuluiva senituri, ‘Seneguroka’, “O le Tamaita’i Kiona”.

Na ia toso ifo ona lima i le ua o lona peleue tasito. A o laei isi tagata i ofu faaonaponei, na filifili lava e Nikolao ona laei i Milani, o se peleue tasi le faamau mai Parioni ma sona kola malo. O se la’ei tulaga ese ma le matagofie, na filifilia ona sa laei ai le Alii Sili o Uinisora i nei ituaiga suti i le 1930s ma le 1940s. Sa avea o se teuga matagofie na momo’o i ai Nikolao, fetau ma lana tautalaga, a e ua ia faafou lona foliga i le suiga o le fusiua masani – sa le’i o gatasi ma lana soesā na sele – i se fusiua faasilika, teuteua i taimane Rusia lanu siliva.

Ua ia iloa ua matagofie ona laei, ona ia ulufale atu lea i totonu o le potu o faafiafiaga.

Na iila mai le fola o mapu i lalo ifo o moli tautau matagofie, o se meaalofo mai le kamupani o loo faatautaia lenei faamoemoe. O laulau sa faataamilo i le fola o le fale siva. A o saasaaga aloaia ua amata. Ua milo faatasi tagata lautele ma tagata mauualuluga o ta’ita’i ma le au fai polotiki e i ai le paoa, faatalitali i le sa’o o le lue o le ulu, o sina avanoa e talanoa ai ma le ta’ita’i talafeagai, po o se musumusu atu mo ni faiga paaga.

O le Palemia o Rusia ma le Peresetene o Amerika na aupito tumutumu ai tagata i a lau tulimanu. Sa taumafai le tagata ia e maua ni ana lagolago i le faapefea ona tagofia le fuafuaga faasaga i le taufaamata’u mai o meatau niukilia. O se fonotaga taua tele faatatau i lea mataupu ua faatulaga e faia i Pitasipeka pe a maea le faafiafiaga o fai nei. O le faamaufaaailogaina o Kerenopili, o le faailoga vaaia lea o le amataga o lea fonotaga.

Na sioa atu Nikolao i le pealua a o siosiomia e le sami o tagata. Na ia fuafua e aau atu i totonu o ia vai. E tusa ma lona lauiloa faatupulaia o se tagata e tautala mo le toefuataiga o niukilia, o le a faigofie lava ona faa-avanoa mai e nei sami o tagata le auala mo ia.

E ao ona ia faatalofa atu i nei ta’ita’i e toalua o loo ia fuafua e fasioti.

A e na te le’i aau atu i totonu o ogasami, na ia savali agai atu ia Elena. Sa ia tu mai i tafatafa o se tasi faamalama lolo’u. O ie faalamalama silika mamafa na fai ma faavaa o le faamalama faapea le fafine. Sa matagofie lona faatusa i le laei uliuli sa fetafea’i pei se suauu i luga o lona fuatino pa’e’e, pei o se faatusa teine fai ata tifaga mai Olivutu ua toe ola mai. Sa ia uu se ipu uaina laumiumi i lona lima, e pei ua faagaloina. Na ia faasaga atu i le pogisa o i tua atu o le faamalama. Na faatasi atu i ai Nikolao.

O tala atu o le faatafuna o le aai, sa emoemo mai ai moli malamalama i tala ane o le tafailagi. O le aufaigaluega o le a galulue i le po atoa e faatulaga ia sauni lelei nofoaga, ma ia mautinoa le faapipiiga o le Sakofagu fou i luga ae o le atigi o Kerenopili ia gasolo lelei. O mata uma o le lalolagi o le a i luga o le faamoemoe pe a faataunuu.

Na ia tago atu i le lima o Elena.

Sa le’i faateia o ia, ona sa ia iloa atu lona ata i le faata.

O lana Rasapotino tausaaia.

“Toe itiiti lava ona uma lea,” na ia fai atu ai ma faalagolago atu i lona taliga.

E tusa ma le tala a lana tamaloa, o meatau faalavelave ua uma ona faamautu i o latou tulaga. E leai se mea na te mafai ona taofia i latou.

8.40 afiafi.

Punitapu, Initia.

Na sasao a’e i luga le pā pā o pulufana a e le’i taunuu Karai i le pito o le nuu. Na lagonaina leo o taumanuō ma auega. O luga i helikopa sa faaopeopea na patapatatū mai ai. Na faapupuu faagatasi lelei Karai ma se puipui maa. O tala atu o tafuga afi e lua, na malōlō mai ai le taavale Mesiti i le pito o lona susulu.

O se fitafita sa laei toniga uliuli na tamo’e punou atu i le malae taalaelae, ma lana fana sa tautau i lona tau’au. O isi atonu ua uma ona mautu o latou tulaga i autafa o le nuu, ma latou lokaina. Ona latou faasolo mai ai lea i totonu mo le fasiotia, e fufulu atoa le nuu.

Na iloa e Karai na o le pau le faamoemoe o le nuu, o la latou vaega ina ia sosola, e faatosina atu ai tagata faatupu faalavelave. E tatau ona latou sosola a e le'i mautu le saisaitia o le nuu.

Na ia aapa atu lona lima i tua ia Rosauro. "Aumai le ki."

Na faapipii atu ki i ona lima, a o Rosauro na ia ta'u ane nisi tala faalētonu. "O Koualasaki. Ma Elisapeta. E lē o iinei i la'ua."

Na toe tepa atu i tua Karai. O le vevesi solo i le pi'opi'o o le auala, na ia lē maitauina ai. "Su'e po o fea o i ai," na ia faatonu atu ai Rosauro. "Fai loa!"

Na lue lona ulu ma tamo'e ese.

Na pupula malosi atu Karai ia Luka. "Puipui le polofesa. Lalafi faalelei 'aue' i iloa mai oulua." Na lue le ulu o le Kipisi. E lua ni naifi na iila mai ona lima.

Ua le mafai ona toe faatali Karai.

A o ia punou maulalo, na ia tamo'e ese ai mai lona lafiga a e alu atu i le taalaelae.

Na tamomo'e ese atu Elisapeta ma Koualasaki i le auala fepi'opi'oa'i. O se paipa o faleui sa i le tasi itu, ua liki ma ua manogi ai.

"Mulimuli atu i le paipa lena," na fai atu ai Elisapeta. "E tatau ona tau atu i fafo."

Na lue mai Koualasaki ma pi'o i le isi pi'oga. Na ia uu lana fana i ona lima mafiafia. A o le tamaitai sa pipii atu i ona tau'au.

"E i ai se isi fana?" na fesili ai Elisapeta.

"E te iloa fana?"

"Ia, mai taaloga fanafana. I le kolisi."

"E leai se eseesega. Pau le mea e malosi atu le tagi a le tagata pe a lavea."

Na tago ifo i lalo o lona peleue i le pito o lona papatua, ma se'i ane se tama'i fana lanu moana itiiti ma tuu atu ia te ia aunoa ma lona pupula i ai. Na faamau lelei ona tamatama'ilima i lana uu, o lona malosi mai le uamea malulu.

Na laua o ese loa. Na tuufua le auala autu, peitai sa pā pā mai pulufana mai pito o le nuu a o taumafai nai tagata e puipui o latou aiga ma o latou ola.

Na lele maulalo ifo se tasi o elikopa. O le savili mai ona pe'ape'a na taape solo ai lau laau ma otaota. Na latou fe'alofa'i lalafi atu i totonu o se faleoo palapala. Na iloa atu e Elisapeta le ataata o tamaiti o faapupu'u i lalo o se moega maulalo.

Na lele ese le elikopa, ona uuna'i atu lea e Koualasaki o Elisapeta agai i le faitotoa – a e na vave ona ia toe afisi atu o ia ia te ia. O se fitafita ofu uliuli na tamoe atu i le laolao avanoa. E le taumate o le taua ua oo atu i totonu o le nuu. Na autilo atu Koualasaki i fafo, ona talo atu lea mo Elisapeta, ma ta'ita'i ia te ia i totonu.

"O le a ta faasasa'o i le atu mauga," na ia fai atu ai.

Na la'ua o faasipasipa atu i nisi o pi'oga se lua ma taunuu atu ai i se sa'oga e faasasa'o agai i mauga. Na taatitia ai tino manunu'a i luga o le auala, o tafe totoi ma tafe atu i le alavai o otaota. E silia ma le toatasi sa ofu uliuli. Na pipii faalatalata Koualasaki i le isi pito o le puipui ma faanatinati atu i le isi pito. Na ia muamua atu ma lana fana o loo uu sauni i luga.

Na oteote mai le pa pa o pulufana i tala atu o le nuu.

A faapefea ona la sao atu ai?

Na ia tu faatali ai i autafa o se tasi fitafita ua maliu. Na ia tago atu e to ese le pulou o le fitafita. Atonu o se faafoliga, na manatu ai Elisapeta. E le o se mafaufauga leaga.

Peitai a o tago atu Koualasaki e to ese le pulou, na pa'ū ese mai le ulu o le tamaloa faatasi ma lona pulou.

O lona te'i ma le fefe, na ia pa'ū atu ai i luga o Elisapeta. Na la'ua lavelavea, ma palalasi faatasi ai i lalo.

Na tu mai se ataata pogisa i o la'ua tua.

O se isi foi fitafita.

Na sii a'e e Elisapeta lana fana ma soona faapā atu. Na tatagi le pulufana i maa ma toe felele solo, na misi le tagata sa fuafua i ai, a e na mafai ona toe tuli atu ai o ia i tua i le tulimanu.

Na pa a'e le fana a Koualasaki i ona tua ane, na pei o se pomu i le alia va-apiapi. Na ia tepa ane mai ona tau'au ma iloa atu nisi fitafita e toalua i le faasi'usi'uga o le auala.

O i la'ua ua taofiofia i lalo ma ua sili atu le toatele o le isi vaega nai lo i la'ua.

Na oso ese Karai mai le alia ma alu ane i le laolao. Na ia 'alo ma lafi i lalo o se taavale povi sa tu ai i tafatafa o le isi afi. Na ia sosolo i lona manava ma faagatasi ma se isi afi. Na puipuia lilo o ia e le taavale povi, na mafai ai ona alu taunuu i le pito o le tafunai. Pe afai e lē mafai e pulufana ma

elikopa ona faasegisegi ese le povi mai lona tulaga o i ai, lona uiga e tatau ia Karai ona tutu se afi ma tuu i lalo o lona si'usi'u.

O le upu moni lena i le mea o le a fai.

Na tago atu Karai i se pa'u taavale sa mumū i le pito o le tafuna'i, ma lia'i atu i luga o le faaputuga otaota o loo suā'u'a o i ai i luga o le taavale toso. E le'i umi a e sasao a'e i luga le mumū o le afi. Na ia u'u pea se isi motumotu i lona lima, ma tolotolo atu i lalo o le taavale toso ma sunusunu atu lalo o le povi.

Na faataiō leotele le manu ma kiki ane ona vae i tua, na lavea faamo'amo'a ai le taavale. Na pipii atu Karai i le pito i luma o le taavale a o oso ese le povi ma lana tagi i le ita ma le faalii. Na ia tamō'e sa'o agai i le atumauga, o toso atu le taavale, a o to'ulu paepae atu ai otaota o loo mu i le afi.

Na pipii mau Karai a o ia taia patapatatū solo i lalo o le taavale, na ia 'alo 'alo mamao ese mai uili mamafa o le taavale toso. Na taunuu le povi ma le taavale i luga o le mati'e ona pa'u'ū atu lea i se 'autu i le itu. Na faamamulu lima o Karai ma pa'ū atu ai faamagoto i le palapala.

Na alu atu pea le taavale agai i mauga, o se mitioa mumū o folau atu i se itulagi lēmailoa. Na tatalo Karai ia tulimata'i atu e ni mata o i le lagi le lelea atu o lena afi.

Na aau atu Karai i le pogisa ma le mafiafia o le palapala a o faataamilo atu le alavai i le nuu. Na ia taunuu atu i le itu aupito mamao ese o le taavale Mesiti ma faatalitali ai mo leelikopa aupito lata ane ina ia alu ese mamao – ona ia oso ese lea mai le autu ma tamō'e punou i le eleele, o le taavale i lo laua va ma le nuu.

E tatau ona ia vave oo i totonu o le taavale. E mumū molī o le taavale pe a tatala ona faitotoa. A o ia uu ki o le taavale i ona lima, na ia manava tele i totonu.

Na te le toe faatali.

O Elisapeta, a o saisaitia o ia i totonu o le autu, ma fitafita i ona itu uma, na ia saili se auala e sola ese ai. Na ia maua, i se faamalama matala. Lata ane. Na ia eueu Koualasaki ma faasino atu i ai. "Alu!" na gugulu atu ai Koualasaki ia te ia.

Na ia puna atu i le laolao. A o uu pea lana tamai fana, na ia palasi atu i totonu. O le potu sa gaogao, na o le fola palapalā. Na taavale faapaelo mai Koualasaki i ona tua. Toeitiiti lava a tuai ona alu ese Elisapeta mai le auala. Na feemo pulufana i

vae o Koualasaki. Na lagona le patapatatū mai o seevae malō agai mai ia i la'ua mai itu uma.

"Le faitoto'a," na valaau atu ai Elisapeta.

I le itu faafeagai ma le faamalama, na ui atu ai se auala agai i se isi alia. Na la'ua sosola saosaoa faatasi atu i fafo – taunuu tonu atu lava i le mea sa i ai nisi fitafita e to'afa.

Na faate'ia vaega uma, ma tau fai autago e se'i a'e a latou auupega o laau malolosi. Peitai a e le'i amoti ma pa se fana e tasi, na faate'ia i le fe'ilafi mai o le iila o naifi sasa uamea na toulu ifo i luga o fitafita. Na solomuli faatatafa faatasi i tua Elisapeta ma Koualasaki. O se tasi tamaloa na faata atu lana fana i le au osofa'i, a e na emo atu le naifi sasa ma sesele ese lona lima.

Na pa'ū ifo le isi i lalo, ua seleia uma lona fa'a'ī. I sina taimi itiiti pei o le ta ta o le fatu, na faaumatia ai fitafita e to'afa, ua matuā malepelepe. E toatolu le au faaola.

O Api ma se toalua mai le nuu.

O a latou auupega e tulaga ese i totonu o le atunuu. Urumi. O le pelu sasa ta'uta'ua a Initia. E tofu le pelu ma ona lau e fa, e ta'i inisi le lautele a e lima futu le uumi – o lo latou manifinifi tele e taataai ai pei o ni sasa. Na fa'aali atu e lona tamā ia Elisapeta le faatinoga o le osofaiga e ta'ua o le Kalaripaiatu. O sina minoi itiiti o le tapulima e taavili atu ai lau o le pelu ma to mai aano o le tino, i se malos i e sili atu nai lo pelu masani.

"O mai!" na fai atu ai Api. "O la outou vaega o loo i le itu lea."

Na ia ta'ita'iina i latou i tua i totonu o le nuu. Na latou mulimuli atu i se auala taamilomilo solo e ui atu i faleoo ma aiga o le nuu. O Api sa fai ma sasau atu lana pelu, e taia ma faaumatia ai le toatele, sa lalafi solo ma lilo i tulimanu. Ona ia toe oso atu lea e faauma le galuega o fai e lana vaega.

Na fe'emoa'i mata o Koualasaki i le pogisa a o ia vaai atu i le fasi. "O auupega faapena na ta'ua ai i latou o le au lē matagofia. E tatau ona i ai sa'u pelu faapena."

Na latou oo mai i se isi tulimanu, ona toe sasau atu lea e Api o lana pelu sasa – ona ia toe se'i mai lea o lona lima ma le uamea iila. Na lagona atu le leo o le te'i mai tua o le pi'oga.

"Faamalie atu," na fai atu ai Api.

Na aliali mai Rosau. Na uu lona alofilima i lona alafau. O loo tafe mai ai le toto i lalo o ona tamatama'ilima. A o ona mata sa pupula lautele

ina ua ia iloa atu i latou sa faatasi ma le tagata tau pelu.

“Faafetai i le Atua ua ou maua outou,” na ia fai atu ai. “Faavave.”

E pei o se vaega e tasi, na latou sosola faavave ese ai, mulimuli atu ia te ia.

O le te’a atu ai o ni pi’oga faigatā, na iloa atu ai le mumū mai o afi masani e lua i le faasi’usi’uga o se autu. Na faapupuu ai Luka i le va o ni faleoo e lua, ma talotalo atu ia i latou. Na iloa atu e Elisapeta le polofesa o faapoululu i totonu o ataata.

Poo fea o i ai Karai?

E peiseai o se tali mai, le ola leotele mai o le afi o se taavale i tala atu o le nuu.

“Ia sauni!” na valaau atu ai Rosauro ia i latou, a o tafe ifo pea le toto mai ona foliga.

Sauni mo le ā?

Na sui le kia a Karai ma oomi le vae penisini tau i lalo. Na vivili uma pa’u e fa o le taavale ma oso atu i luma. Na tifa atu le tamai veni ao salalau le tasi tioata i tua o le taavale. Na oso atu le veni i le va o tafuna’i o otaota.

Na lele mai luma se tasi elikopa. Sa le’i i ai se fana na faapipii ai, peitai sa i ai se tagata na tautau ifo ai i le faitotoa i le isi itu, sa i ai sana fana taavili.

Na tu malosi Karai i taofi o le taavale. Na pipisi solo pulufana i totonu o le palapala i luma atu o le talipefu o le taavale. Na tatope le suiga i le solomuli, papa le vae penisini, ma pepefu i tua i le malosi o le lima selau solofanua.

Na ia mimilo tu le ave o le taavale, feliiua’i ma sisi a’e i luga i uili e lua. Na toe palasi ifo i uili e fa ua toe faasaga i luma, ona faaoso atu lea i le autu na sau ai, ona taia lea o le tapuni i tua o le taavale. Na mumū mai le moli faailoilo o le taavale ina ua masu’e i luga le tapuni i tua. Na osotu atu le taavale i le va o tafuna’i, ma faataape solo ai aloiafi o otaota.

Na tu faafuase’i, toeitiiti lavea ai vae o Rosauro a o ia vevesi atu i ai ma isi tagata.

Na latou feosofi faapa’u’ū faatasi i le pito i tua. Na toululu atu tagata ma faaavanoa le ogatotonu. Na iloa atu e Karai se foliga e masani ai pei o se ulu o se taifau. Ua latou maua Koualasaki.

Ma Elisapeta foi.

O le taimi nei o loo ua afifi lelei i lalo o le tamaloa lapo’ā.

Na valaau atu Rosauro mai tua, “Alu!”

Na kiki e Karai le vae penisini ma oomi le ki e tapuni ai le faitotoa i tua. O luma atu, e lua elikopa sa faasasaga sa’o mai i itu e lua. Na pisi solo pulufana i le palapala i fafo i le itu o le taavale. Na faatifa e Karai le taavale i le tasi itu toe seu i le isi itu.

Na faapena foi ona faata’ita’i i ai le seuga o elikopa.

O se tafega fou o pulufana na sau mai le nuu i ona tua – sa fuafua mo manulele o faaopeopea i le vanimonimo. Na mataina le salalau mai o ia pulu, na o mai faatasi ma leo afi faatonutonu. E lē mailoa pe ua maua e se toaititi o le nuu ia auupega otometi a le au osofa’i. Na pa’ū ifo i lalo se tasi o fanafana lafilafi mai le elikopa. O lana moli uila na pe mate ma ta’eta’ei.

O le isi elikopa na lele ese. Na mimilo ese Karai mai le timu o pulufana ma agai atu i le mauga. Sa le’i faaitiitia le saosaoa o le taavale. O le pe o moli, na ia mulimuli atu ai i le auala o le taavale povi, ma le faamoemoe o fea lava e tata’i i ai e le povi, o le a sao atu ai le taavale e ‘ai uma uili e fa.

Na ia alu ese mai le malamalama o le mumū o tafuna’i o le nuu ma alu atu i le pogisa. E lua elikopa na tuli tatao atu i a la’ua moli sulu. O le lona tolu na faaitiiti ifo i le taufaasi’usi’uga o le nuu, na faatoululu ifo ai ni maea i lalo, o loo ao atu tamaloloa o feoa’i solo.

Na faalagolago atu Rosauro. “O tagata Rusia!” “Rusia?”

“O lo’u manatu lena,” na ia fai atu ai. “O fitafita na latou tauaveina AN-94.”

O fana mo osofaiga a fitafita Rusia.

O le faata mo tua na iloa atu ai e Karai foliga popole o Matesone. Muamua o se vaega o fitafita tau a Amerika, a o lenei o Rusia... Pe fia ni tagata o manao ia oti lenei tamali’i? O le a faatali ia le tali mo le taimi nei.

Na iloa atu e Karai e ala i lana faata, ua latalata tele mai elikopa. E ui ina sa manuia le fuafuaga a Karai – o le aveese mai o le latou vaega mai le nuu ma faasegisegi ese le au tau na osofaia – a e faapefea nei?

“Liliu i le itu taumatau pe a taunuu i lalo o le isi mauga na e sosoo ai!” o se leo i ona tua e i ai le namu Peretania. Na tepa atu Karai i tua ma iloa ai o loo i ai se tagata sola ese, o loo i le uta.

Apihi Panitee.

(soso’o atu Sulu Samoa Fepuari 2024)

O AFIGA E TULEI MAI ONA FOFOGA

FAAMUAMUA MEA MUAMUA

“¹²Ia faapea ona e a’oa’o mai ia i matou e faitauina o matou aso, ina ia maua ai le poto i o matou loto.” Sala.90.

Tatou te tau fai maua tutusa le 24 itula i le aso. Tusa lea o le 1,440 minute po o le 86,400 sekone. Ma e ao ona tatou tuuina atu i le Atua, se tala pe faapefea ona tatou fa’aogaina nei taimi (Faila.11) O se amataga lelei tele lou fesili ifo, ‘E faapefea ona ou fa’aalu le isi 24 itula pe ana fai ou te iloa, o le a ou tula’i i luma o le Atua taeao?’ A lau tali e fesoasoani atu ina ia faamuamua lou olaga. Manatunatu i ai: pe afai e gaoia e se tagata lou sa, e mafai ona e toe maua se isi taavale. Pe latou te gaoia lau ato tupe, o nai telefoni valaau ai i le kamupani e ona pepa tala tupe, e faauma ai le popole i lea mataupu. A o ai e te valaau i ai pe afai e leiloa lou taimi? O le faapefea ona e fa’aalu lou taimi, o le faapefea foi lena ona e fa’aalu lou olaga. Fai mai le Efeso 5, “¹⁶ia fa’aogaina e outou aso o lenei olaga, auā o ona po nei ua leaga.” O lea, ia a’oa’oina oe e fai mea nei:

i)Ia soia le fai atu ‘ioe’ i tagata uma. Pe afai e musumusuina oe o ou lagona faaleagaga e fai atu leai, a o ou faalogona faafiafia tagata o loo fai atu ioe, ia sili ona e faalogo ma usitai i ou lagona faaleagaga. Na fai faapena e Iesu. O le ala lena sa mafai ai ona ia fai atu i lona Tama, “⁴Ua ou tuu atu le mamalu ia te oe i le lalolagi; ua ou faaumaina le galuega na e tuuina mai ia te au, ou te faia.” Ioane 17. ‘Aua le avea le mea lelei, na te faoa le mea e sili atu ona lelei, mai ia te oe; o lou solomuli ese mai nisi mea iti, e te a’ea ma faasilisili ai i nisi mea e tele.

ii) Ia taitaiina oe e le Agaga, a e lē o le tino. O la le aposetolo, “¹⁶Ou te fai atu, ia outou savavali i la le Agaga, ona lē faia lea e outou o le tuinanau o le tino.” Kala.5. E le gata i lena, a e afai e te savali i le Agaga, e te susunuina le suau’u a e lē o le vavae; o le Agaga Paia na te foaiina atu le malosia ia te oe.

iii) Ia faamuamua mea e tataua ona muamua. O se tasi faailoga o le avea ma tagata matua, o le faia

lea o se mea e te lē o lagonaina e tataua ona fai. O lea, i lenei tausaga ua amata, ia tuu mea e ao ona faamuamua i lona tulaga faamuamua – ma tuu ai pea iina!

TAUSAGA FOU, AMATAGA FOU

“⁴O lenei, ua tatanu faatasi i tatou ma ia i le papatisoga i lona maluu; ina ia tatou savavali i le ola toefuataiina, pei ona toe faatuina mai o Keriso nai e ua oti, i le mamalu o le Tamā.”

Ia e taumafai malosia e ‘aua ne’i avea lou tuana’i na te faoa lou lumana’i, po o ou leaga ananafi e punitia ai ou manuia a taeao. O lenei tausaga fou o loo finagalo le Atua na te avatu ia te oe se amataga fou. E mautinoa lava le tele o a tatou faia ma sootaga manu’anu’a e lē mafai ona fofō ma togafiti, ma le anoanoa’i o faafitauli ma toatūgā o fai pea ma avega mamafa i o tatou loto ma mafaufau. Peitai ona o le alofa tunoa o le Atua, e mafai ona tatou faagalo, faamagalo ma agai pea i luma. E te lē toe tau taoto i le po a e ala pea i lou tofaga, ma saga toe eli a’e i luga ivi ua leva ona mamago, e valuvalusia ma’ila’ila o manu’a ua mamate, ma toe lalaga a’e i le manatua mea tiga na ui mai ai. Pe afai e te saga tuu pea i ai se avanoa, ona nofo mau lea o le aitu o lou tuana’i i totonu o lou mafaufau ma lou ulu.

Atonu e te faapea ane, ‘O loo o’u tauivi pea ma le tele o faaletonu i le tele o itu.’ E faapena uma lava tagata ola. E oo lava i le aposetolo o Paulo na ia ta’utino, lona lē atoatoa. E lē pei o isi tagata latou te tuuai ma tulei i isi o latou lava vaivaiga. Fai mai a ia, “¹⁵Auā ou te lē iloa mea ou te faia; auā o le mea ou te faia ou te lē loto i ai, a o le mea ou te inoino i ai o lea ou te faia...¹⁷O lenei, e lē o a’u e toe faia lea mea, a o le agasala o loo nofo i totonu ia te a’u. ¹⁸Auā ua ou iloa e leai se mea lelei ua nofo i totonu ia te au..auā ua ia te a’u le loto atu, a ou te le’i iloa ona fai o le mea lelei; ¹⁹auā ou te lē faia o le mea lelei ou te loto i ai, a o le mea leaga ou te lē loto i ai, o le mea lea ou te faia.” Roma 7. E momoli atu la matou faafetai tele lava i lau susuga i le aposetolo Paulo, mai ia te i matou uma o loo i ai le manatu sesē faapea e Kerisiano loa le tagata, ona lē toe i ai lea o ni tauiviga! A e le’i gata ai iina le

apostatolo; ua ia faaopoopo foi nisi mau tāua mai le Roma 6:

i).. *“⁴O lenei, ua tatanu faatasi i tatou ma ia i le papatisoga i lona maliu; ina ia tatou savavali i le ola toefuataiina”.*

ii) *“¹¹Ia faapea foi la outou taofi, ua outou oti i la le agasala, a ua outou ola lava i la le Atua i lo tatou Alii o Iesu Keriso.*

Pe afai e te fesili, ‘E faapefea la ona ou tagofia o’u faalētonu tuai?’ O lena o loo iina le tofa ma le uta, e talitonu foi ua nofo fale ia Tuisamaa i finagalo, le a’oa’oga a lo tatou Alii. A e na o se tuualalo ma se tali faaopoopo. Ia ta’utino ma faailoa, tuu ese ma faagalo loa! E te manaomia se malosi e lava ma totoe, e te manumalo ai i au tauiviga. ‘Aua e te fia malosi i mea e te lē gafatia; ia ave le paoa, le malosi ma le mana o le Keriso Toetu na te pulea lou ola. Pau lena o le malosi na te soloi ese leaga o ananafi ma lena tausaga ua alu, ma saunia ai oe ua toefuataiina mo le malaga o lenei tausaga ua amata.

O AGELU

“¹¹Auā e poloai atu ia i ana agelu ia te oe, e tausi ia te oe i ou ala uma.”

I le Tusi Paia, e silia ma le tolu selau mau e faasino i agelu. Mai lava i le amataga o le lalolagi, na tofia ai kerupi e leoleo le laau o le ola i Etena (Kenese 3:24), seia oo lava i le Mataupu faai’u o le Tusi o Fa’aaliga (22:16). E mafuli atu le faamatalaina o agelu i upu e lua: o le *toatele* (Fa’aaliga 5:11), ma le *malolosi* (Fa’aaliga 10:1). E i ai taimi e o mai ai i latou o se ‘au e toatele ma malolosi, a e i ai foi taimi e auina mai ai i latou e taitoatasi. E tasi lava le agelu na manaomia, na te punitia gutu o leona sa i le ana na lafo i ai Tanielu (Tanielu 6:22), e toatasi le agelu na ia laveaiina le apostolo o Peteru mai le fale puipui (Galuega 12:7), e toatasi foi le agelu na fa’aali ane i le apostolo o Paulo i le po, e faamalosi ia te ia a o aga atu i Roma (Galuega 27:23). O nisi agelu ua manino lava o latou igoa e pei o Kaperielu, sa fa’aali ane ia Iosefa ma Maria.

Manatua foi le tala i le auauna a Elisaia? Ina ua si’osi’omia e le autau a Suria le aai o Totana sa i ai Elisaia, na vaaia atu le auauna a Elisaia ona fefe ai lea, ma tatalo ai Elisaia i le Atua. *“¹⁷Ona tatalo ai lea o Elisaia, ua faapea atu, Le Alii e, ia e faapupula i ona mata ina ia na iloa. Ona faapupulaina lea e le Alii o mata o le taule’ale’a, ona iloa ai lea e ia, faauta foi, ua tumu le mauga i solofanua ma kariota afi, ua latou vagavagai ia Elisaia.”* II Tupu 6. Pe afai e faapupulaina ou mata e le Atua i lenei aso, o le a se vaaiga o le a e iloa atu? O ni agelu o loo latou ta’ita’i atu lau fanau i le a’oga? O se agelu o loo leoleoina oe mai faalavelave tutupu, ona o ave taavale onanā ma taavale soona saosaoa? O se agelu o loo lagolago ma fesoasoani i aao o alii fomai o faia lou ta’otoga? O leoleoina oe a o e malolo ma moe filemu?

Soo se tagata Kerisiano e ao ona ia faamoemoe o loo i ai agelu malolosi o loo latou tautoaluaina i latou i soo se mea e tupu o le soifuaga. Pe o tofua le tagata ma se agelu o loo leoleo ma puipuia o ia? E leai. O la le apostolo i lana Tusi ia Eperu, *“¹⁴E le o agaga e auauna ea i latou o e a maua le ola?”* Pe afai e te teena Iesu, ua e misia foi le puipuiga e sili ona malu, a e afai e te talia o Ia o lou Alii ma lou Faaola, ona e maua lea o se puipuiga e 24 itula i le 7 aso o lou olaga atoa. Aiseā? E faapefea? Auā o lea ua folafolaina mai, *“⁷E to lauapi le agelu a le Alii e siosiomia ai e o matatau ia te ia, e lavea’i foi o ia ia te i latou.”* Sala.34.

Ia silafia foi, o lau agelu e lē na ona ia talotalo mai pe a pasi ane o ia; a e na te to lona faleie i ou autafa, e siosiomia oe ma leoleo, e mataala ma tumau ai. E te lagona le saogalemu mautinoa i lalo o le paolo o ona apaau, ma pe afai e lē mafai e lena puipuiga malu ona faaititia pe soloiese lou popole ma le atuatuvaile, e leai se isi mea na te mafaia! O le upu moni, e toatele tagata mau’oa ma tamaoaga o le lalolagi latou te lē maua lea faamanuiaga, e tusa lava pe toatele a latou fitafita, leoleo ma sikulakī. A e amuia lava i tatou o mulimuli ia Iesu, o puipuia aunoa se togoti!

Faatonu Sulu

ILOILOGA O SU'EGA A LE MALO – SAMOA SENIOR LEAVING CERTIFICATE (SSLC) 2023.

KOLISI MALUAFOU:

AOFA'I O TAMAITI NASU'E = 117
(9 e le o maua i'uga o suega seiloga e
totogi pili o su'ega i le Ofisa o Aoga. (MEC))

% PASI O TAMAITI (Togi Ausia) = 77%

MATAUPU & % PASI :

ENGLISH	=	36/99	=	36%
SAMOAN	=	91/99	=	92%
MATHS	=	1/75	=	1%
ACCOUNTING	=	25/32	=	78%
ECONOMICS	=	25/41	=	61%
GEOGRAPHY	=	17/19	=	89%
HISTORY	=	4/19	=	21%
BIOLOGY	=	6/19	=	32%
CHEMISTRY	=	5/18	=	28%
PHYSICS	=	2/5	=	40%
VISUAL ARTS	=	3/8	=	38%
FTT	=	5/7	=	71%
COMP. ST.	=	71/99	=	72%

KOLISI TUASIVI:

AOFA'I TAMAITI NASU'E = 29
(3 e le o maua i'uga o su'ega, se'i uma ona
totogi pili i le Ofisa (MEC))

% PASI O TAMAITI = 19/29 = 66%

MATAUPU & % PASI:

ENGLISH	=	19/29	=	66%
SAMOAN	=	27/29	=	93%
MATHS	=	7/23	=	30%
ACCOUNTING	=	2/6	=	33%
ECONOMICS	=	2/7	=	29%
GEOGRAPHY	=	2/7	=	29%
HISTORY	=	0/3	=	0%
BIOLOGY	=	5/8	=	63%
CHEMISTRY	=	0/6	=	0%
PHYSICS	=	4/4	=	100%
VISUAL ARTS	=	3/7	=	43%
HPE	=	2/2	=	100%
FTT	=	4/4	=	100%
COMP. STD	=	15/16	=	94%

KOLISI LEULUMOEGA FOU:

AOFA'I TAMAITI NASU'E = 69
(1 e le o maua i'uga o suega
seiloga e totogi le pili su'ega i le Ofisa (MEC)).

% PASI O TAMAITI 30/69 = 43%

MATAUPU & % PASI

ENGLISH	=	7/69	=	10%
SAMOAN	=	64/69	=	93%
MATHS	=	2/30	=	7%
ACCOUNTING	=	3/17	=	18%
ECONOMICS	=	3/16	=	19%
GEOGRAPHY	=	4/11	=	36%
HISTORY	=	1/11	=	9%
BIOLOGY	=	3/14	=	21%
CHEMISTRY	=	2/14	=	14%
VISUAL ARTS	=	11/24	=	46%
HPE	=	5/27	=	19%
COMP. STD.	=	16/65	=	25%

KOLISI PAPAUTA:

AOFA'I TAMAITI NASU'E = 13
AOFA'I TAMAITI NA PASI = 13

PASENE O TAMAITI NA PASI = 100%

MATAUPU & % PASI

ENGLISH	=	8/13	=	62%
SAMOAN	=	13/13	=	100%
COMP. STUD.	=	12/13	=	92%
ACCOUNTING	=	1/2	=	50%
ECONOMICS	=	1/2	=	50%
GEOGRAPHY	=	2/3	=	67%
HISTORY	=	0/3	=	0%
VISUAL ARTS	=	3/5	=	60%
FTT	=	3/4	=	75%

(Faauma itulau 16)

O E UA MALILIU

TI'A PAULI FOGALEVAI **TOLUA II.**

(3/1/1963 - 2/1/2024 (61 tausaga)

O le susuga i le A'oa'o Fesoasoani o le EFKS Foua, Salelologa, Pulega Safotulafai o le Matagaluega Faasaleleaga. O ona matua o Ti'a Ami o Salelologa le tamā, a o le tamaitai tausi soifua faauuina ia Lesi Iosia o Salelesi ma Nu'uuli Amerika Samoa lona tina. Na fanau o ia i lona aiga i Vai'ō, Sapulu Salelologa i le Aso Tofi 3 Ianuari 1963 a e na faamanavaina e lona Matai ana galuega i le Aso Lua, 2 Ianuari 2024, a o faataotolia ai i lona gasegase i le Maota Gasegase o Malietoa Tanumafili II i Tuasivi. Ua atoa lelei ai le 61 tausaga o lona soifua. Sa a'oa'oina i le Tulaga Lua a lona nuu, soso'o ai le Kolisi o Avele ma auina atu ai i Amerika Samoa seia oo i Amerika na a'oga ma galue ai. Na toe taliu mai i Samoa tautua i le aiga seia oo ina faapaleina i ona suafa matai, faapea le Ekalesia e ala i lona tofi A'oa'o Fesoasoani. Na faaipoipo atu ia Lotofoa o Sapapalii ma fanaua se fanau teine e to'alua, o le ulumatua ia Pologa le faletua o le A'oa'o Malua o Faasaoina Komiti AM.

O lona sauniga faaleaiga na ou ta'ita'iina i le Maota Faasausau o Malietoa Tanumafili II, Tuasivi, i le Aso Lulu, 17 Ianuari 2024. Sa molimauina ai lona soifua e lona aiga, o se tamalii agamalu ma loto maulalo, e alofa faamaoni i lona aiga, lana fanau aemaise lana Ekalesia. O le 6.00am Aso Faraile 19 Ianuari na aveeseina ai lona tino maliu mo lona aiga i Vai'ō Salelologa, a o le itula 10.00am na faia ai lona toe sauniga i le malumalu o le EFKS Salelologa. O lana feagaiga taulagi susuga Valaauina Taumua FS na ta'ita'i, faaulufale atu lona sa e Faasaoina Komiti AM, faitau Tusi Paia le susuga Tini Too (Faifeau Metotisi Ofisa Faleula), tatalo le susuga Silipa Silipa FS (EFKS Fusi Safotulafai), a e lauga le susuga Tiakono Katoliko Salelologa. Na auai Faifeau ma A'oa'o o le Vasega 2020, e molimauina ma faatupu faamafanafana i le itutino ua afaina o la latou mafutaga pele. Na molimau le faletua ia Lotofoa Ti'a, le A'oa'o ia Faasaoina

Komiti AM ma le faletua ia Pologa, le afioga i le Sa'o o le aiga o lona tina, le afioga i le Maopu ia Nevu Faamausili Loma Iosia. O a'u na molimau fai ma sui o le matou aiga, na ou ta'ua ai, e leai se eseese o Ti'a Tolua II lenei, mai le faasologa mai o auga tama na taitai ma tausia lo matou aiga: Ti'a Ami, Ti'a Tolua I, Ti'a Tautele, Matamua Tauamanu, Ti'a Situpea II, o matou auga tamā ua lagomau mai ti'asā. O ni tagata saili malo mo le manuia o lo matou aiga, le nuu aemaise o le galuega a le Atua, e ala i le Ekalesia LMS, le Ekalesia Faapotopotoga Kerisiano Samoa, i totonu o Foua, Salelologa. I latou na ofoina atu tofi ma measina a le aiga, o fanua o loo ua fai nei ma meatotino a le Ekalesia o loo fausia ai le Malumalu, le Maota o le Faafeagaiga, le EFKS Salelologa Hall, e oo lava i faatoaga ma lafumanu a le faifeau.

E le gata i meatotino, ae sili ona ofoina atu le soifua mo le talaiga o le Tala Lelei, e pei ona tuufaasolo mai (e tusa ma lo'u manatua), ia Aso Lealaiauloto FS ma Tafale (na galulue i le EFKS Fagamalo), Latali Ti'a FT, Ulutui Latali Ti'a FT, Lisale Tu FT ma Valelei, Elisara Ti'a FT, Pesaleli Pesaleli FT, Iakopo Pesaleli FS, Letaulau Pesaleli FS, Kuatemanu Ulutui FS, seia oo mai lava i alo ma fanau o aso nei. E maliu nei Ti'a Tolua II ua mafai ona ia toe aumaia le nofo filemu ma le fealofani o le aiga, aemaise o ona tofi ma measina ua tauau ina faoa faaletatau e nisi tagata.

Na molimau le susuga Valaauina Taumua FS i lona soifua faaleagaga ma lana tautua, e ala i le Failautusi o le Aulotu, o le Taitai Komiti o le Alofa, Atina'e, Taulaga Samoa, o le tausiga o usugafono i le Fono Tele, ma le tausiga o lana feagaiga taulagi. E moni ai le sa'i a le tupu o Tavita, "*Aue! ua maliliu toa, ua maumau ai auupega o le taua.*" O le toe sauniga i lona nofoaga mau i le fanua o lona aiga i Maota, Palapalaloa na taitaiina lava e lana Faifeau pele, susuga Valaauina Taumua FS, ma faamavae atu ai i Pese Faamavae a le Au Kerisiano, "*Talofa uso e, tofaina oe...E tumau le faamoemoe, ia Iesu ta te toe feiloai ai.*" Na faai'u le aso fiasia o le A'oa'o Fesoasoani i taumafataga ma fa'aaloaloga masani, na tu tootoo ai le Fetalaiga ia Matafai Tanielu. Talosia nisi toa e tausia le aiga, ma lagolago le galuega a le Atua. Manuia lau malaga.

Saunia: Faitoaga Ti'a Tolua FS, Faatonu Sulu

TI'A PAULI FOGALEVAI

TOLUA II



IUGA SU'EGA SSLC 2023

KOLISI NU'UAUSALA:

AOFA'I NASU'E = 19

AOFA'I & % NAPASI = 16 = 84%

MATAUPU & % PASI

ENGLISH	=	8/19	=	42%
SAMOAN	=	19/19	=	100%
MATHS	=	1/4	=	25%
ACCOUNTING	=	1/2	=	50%
ECCONOMICS	=	1/2	=	50%
GEOGRAPHY	=	4/6	=	66%
HISTORY	=	2/5	=	40%
BIOLOGY	=	0/2	=	0%
CHEMISTRY	=	0/2	=	0%
VISUAL ARTS	=	4/5	=	80%
HPE	=	0/5	=	0%
COMP. STD	=	13/14	=	92.85%

(saunia mai: Ofisa Faatonu A'oga EFKS)



Le Laulau & Sui o le Sosaiete LMS, Lala i Samoa, i se tasi o latou mafutaga.